

UNIBERTSITATEA. Seinaleetan, harrera gunetan eta agirietan elebitasuna ezartzea eskatzen dute, besteak beste

DEMOEN ESKAERAK

1 Seinale elebidunak ezartzea Unibertsitateko egoitzetan.

2 Ikasleei zuzenduriko harrera gunetan, administrazioan, liburutegian, elebitasuna garatzeko plangintza bat abian jartzea.

3 Ikasleei zuzenduriko idazkiak ele bitan izatea.

4 Euskararen eta euskarazko irakaskuntzaren garatzeko baldintza egokiak sortzea.

‘Demoek’ Baionako Unibertsitatean kanpaldia jarri dute euskararen alde

Zuzendaritzak proposamen zehatzak eskaini arte ez direla joango adierazi dute

Nora Arbelbide | BAIONA

Baionako Fakultatearen eta IUTen artean dagoen zelaian hamabost bat oihal etxe jarri zituzten hogeita hamar bat *demoek* atzo goizeko zortzietan. Ingu-ruan, hizkuntza politika eraginkorra aldarrikatzen zuten ban-

derolak irakur zitezkeen. Eskuorriak ere banatu zituzten «galdegiteko lehenbailehen neurriak har ditzaten euskararen garapenerako», Iñaki Etxeleku *demoak* EGUNKARIARI adierazi zionez. Bide beretik, salatu nahi dute, hainbat urtez euskarak leku gehiago ukan dezan

galdegin duten arren, behin ere ez dela erantzun zehatzik eskuratu.

Zelaian jartzearekin batera, lau aldarrikapen proposatu dizkiete bertako zuzendariari. Erantzun zehatzak eskuratu arte «euskara eta aniztasun kulturalaren aldeko» deitu kanpaldia

hor geldituko dela adierazi dute.

Alde batetik, galdegiten dute seinaleak ele bitan ezartzea unibertsitateari lotua den edozein lekutan, izan dadin fakultatean, izan dadin jatetxean, liburutegian eta abar... Seinaleez gain, eskatzen dute ikasleak zuzendaritzarekin eskaraz hitz egiteko aukera ukan dezan, bai liburutegian, administrazioan, edo eta beste horrelako lekuetan. Elebitasun horren garatzeko hemendik urte batzuetara jarria izan litekeen plangintza bat prestatzea galdegiten dute. Horrez gain, ikasleei zuzenduriko idazkiak ele bitan izatea eskatzen dute, eta, azkenik, euskararen eta euskarazko irakaskuntzaren garatzeko baldintza egokiak sortzea.

Hilabeteak pasa, erantzunik ez

Demoak duela hilabete pare bat hasi ziren aldarrikapen zuzenak egiten Fakultateko zuzendariari. Fakultateko dekanok Labayle ikustera joan zirelarik, hark ez zituen errezibitu. Gutun bat bidali zien esanez euskara jadanik biziki garatua zela, euskal ikasketak eta guzti bazirela. «Oro har, denek erantzun berdintsuak ematen dizkigute, diru arazo bat dela, kontuak aspalditik erabakiak direla, eta aldaketa hauek denak gastuak direla», azpimarratu zuen Etxelekuk. Atzo goizean, haatik, dekanok errezibitu zituen, baina berriaz ere erantzun ezezkorra eman. «Ezin dut deus egin, Pauek ditu kartak eskuan, egin dezakedan gauza bakarra informazioa bideratzea da». Hain zuzen, Baionako Unibertsitatea ez da autonomia, Pauekoari lotua da, han dira erabaki guztiak hartzen.

Kanpatzeaz gain, hitzordu bereziak eskaintzen dituzte *demoek* nahi duten guztientzat. Adibidez, gaur 12:30etik 14:00etara, Korrika eta AEKren aurkezpena egingen dute, ele bitan. Astiriko 18:30ean, *Euskara eta unibertsitatea* hitzaldia egingen du Euskal Herriko Unibertsitateko Jose Ramon Etxebarria irakasle kale-ratuak. Ondoren, aperitifa eta ogitartekoak izanen dira, musikal lagundurik.

Bihar, berriaz, eguerdiko orenetan, *Bai Euskarari* akordioa dute aurkeztuko. 18:30ean aldiz, *demoen* eta Ikasle Abertzaleak taldearen arteko topaketa iraganen da.



BOB EDMÉ

Demoak dendak jartzen, atzo goizean, Baionako Fakultatearen aurreko zelaian.

«Zer bat euskararentzat»

‘Demoek’ jarri oihal etxeek eta banatu eskuorriak bat baino gehiago harritu zituzten; usaian hain lasai dagoen unibertsitatean ikasleak galdezka ibili ziren ‘demoen’ artean

N.A. | BAIONA

C'est quoi? (Zer ote da?).
— *Un truc pour le basque* (Zer bat euskararentzat).

— Ah...

Elkarrizketatxo hau entzun zitekeen atzo, ikasleen anizten artean, kanpalekua zeharkatzean.

Ikasle bat baino gehiago harritu zen, *demoek* jarri oihal etxe, banderola eta banatu

eskuorriak ikusirik. Usaian lasai-lasai dagoen unibertsitatean ez baita hain ardura horrelako gertakariak ikusten. Salbu, beharbada, ikasleak hautatu behar direlarik Paueko bulegorako, taldeak kanpainen hasten direlarik, edo «euskaldun horiek» zerbait egiten dutelarik, izan dadin IEI Eren bidez, Euskal Herrian Euskaraz bidez, edo, egun hauetan bezala *demoen* bitartez.

Dena den, errespetuz, gehienek banatu orri horia hartzen zuten. Batzuetan, metro batzuk urrunago lurrera botatzen bazuten ere. Baina gutxi ausartzen ziren denden ondoan jarri mahaira hurbiltzera. «Lehen eguna da. Denbora utzi behar zaie». Iñaki Etxeleku *demoen* kideak arrazoi zuen. Urrunetik so egiten hasi, eta azkenean ausartzen ziren zenbaitzuk.

Ez baita hain errazki kon-

bentzitzen bertako ikaslea. Anitz, arazo horietatik urrun bizi baitira, batzuk Euskal Herrikoak, besteak Landesetakoak, edo Biarnokoak...

Demoek jarri kanpalekuarekin, zuzendaritzaren jokaera salatzeaz gain, ikasleei «kontzientzia harraraztea» izan litekeela helburuetarik bat adierazi zuen Iñaki Etxelekuk. «Espikatu gure aldarrikapenak zein diren, konbentzitu, baina bortxatu gabe».